

Naqqiut

Taarserpaa siunnersuut 14. marts 2017-imeersoq

(Tunngavilersuut: Naqqiut suliarineqarpoq Inatsisartut inatsisinik nalilersuisarfiata, Inatsisartut Allattoqarfianni oqaaseqaatai tunuliaqutaralugit. Naqqiutit pingaernerit allaaserineqarneri: Naqqiuteqartoqarpoq siunnersuummi taaguusersuutit ilaannut, nutaanillu taaguusersuutininik ataasiakkaanik aamma ikkussisoqarluni, tamatumani aamma taaguutinik "pisortat", "pisortat suliffiutaat", "namminersortut suliffiutaat" aamma "suliffeqarfik". §§-ini 4-7-imi, 10-mi aamma 13-15-imi aalajangersakkani erseqqissaasoqarlunilu itisilerisoqarpoq, tamatumani aamma pisortat aamma suliffeqarfiit pisussaaffii ersarinnerusumik, suunersut pillugit, najugaqavissunik ilinniartunik imaluunniit sungiusartunik sulisoqarnissamut, imaluunniit najugaqavissunik ilinniartunik imaluunniit sungiusartunik kapitali 4, 7 imaluunniit 8 naapertorlugit atorfeqartitaqarnissamut. Kapitali 8 imaqarpoq aalajangersakkanik naleqqussakkanik aammalu maanna ilaatigut aalajangerneqarluni pisortat imaluunniit pisortat suliffeqarfiutaat neqeroortitsinermut atatillugu suliassamik tunniussinermi piumasaqaatit ilaattut taamaattumik neqerooruteqartup aalajangersimasunik amerlassusilinnik ilinniartunik imaluunniit sungiusartunik sulisitsiniartup neqeroorutaa atortassagaat, suliassanik ingerlatsinerni pilersitsiviusuni aamma isumaqatigiissutaasut naapertorlugit suliassanik suliaqarnerni.)

Uunga siunnersuut: Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat nr. xx, xx. xxx 2017-imeersoq

Kapitali 1

Siunertaq, nassuiaatit atuuffia aamma piumasaqaatit najugaqavissunik ilinniartoqarnissamut aamma sungiusartoqarnissamut il.il.

Siunertaq

§ 1. Inatsisartut inatsisaat siunertaqarpoq siuarsassallugu pisortat oqartussaasoqarfiisa, pisortat suliffiutaasa aamma suliffeqarfiit namminersortut inuiaqatigiinni akisussaaffeqarnerat, najugaqavissunik ilinniartunik aamma sungiusartunik atorfinitsitsisarnertigut. Inatsisartut inatsisaat siunertaqarpoq siuarsassallugulu suliffeqarneq piginnaasaqassuserlu, najugaqavissunik ilinniartunik sungiusartunillu atorfinitsitsisarnikkut.

Nassuiaatit il.il.

§ 2. Pisortat Inatsisartut inatsisaat naapertorlugu tassaapput pisortaqarfiit, pisortat ataatsimoortut, ingerlatsiviit allatulluunniit ataatsimoortut pisortat ingerlatsiviinut atasuusut, imaluunniit allatut pisortasut imaluunniit pisortanit pigineqartut imaluunniit nakkutigineqartut, aammalu sulisunik atorfeqartitaqartut, Kalaallit Nunaanni ingerlataqartunik. Pisortanulli ilaangillat pisortat, imaluunniit pisortaqatigiit, ingerlatsivik ingerlatarluunniit alla pisortat suliffeqarfiattut taaguusersuinermi ilaasut imm. 2-mut.

Imm. 2. Pisortat suliffiutaattut paasineqassapput Inatsisartut inatsisaat naapertorlugu suliffeqarfiit suulluunniit, suliffinnik ingerlatsisut imaluunniit suliniutinik Kalaallit Nunaanni ingerlatsisut, imaluunniit nioqqutissanik tunisisartut imaluunniit kiffartuussinernik tunisisartut sullitamut ataatsimut imaluunniit sullitanut arlalinnut Kalaallit Nunaanni, pisortanullu taamatulli assigisaanik attaveqartuusut, tak. imm. 1, ingerlatseqatigiiffittut allequtaasutut ingerlatseqatigiiffimmut pingaarnermut attaveqartuusooq tamatumunnga malittarisassat atuuttut naapertorlugit.

Imm. 3. Namminersortut suliffiutaattut Inatsisartut inatsisaanni paasineqassapput suliffeqarfiit suulluunniit suliffinnik ingerlatsisut, imaluunniit suliniutinik Kalaallit Nunaanni ingerlatsisut, imaluunniit nioqqutissanik tunisisartut imaluunniit kiffartuussinernik tunisisartut, sullitamut ataatsimut imaluunniit sullitanut arlalinnut Kalaallit Nunaanni. Namminersortutulli suliffeqarfik tassaangilaq suliffeqarfik pisortat suliffeqarfiattut taaguusersuinermi ilaasoq imm. 2-mi.

Imm. 4. Kalaallit suliffeqarfiattut Inatsisartut inatsisaat naapertorlugu paasineqassaaq suliffeqarfik sunaluunniit, tak. imm. 3, Kalaallit Nunaanni angerlarsimaffeqartoq aammalu Kalaallit Nunaanni suliffeqarfinnut nalunaarsuiffimmi nalunaarsorsimasooq.

Imm. 5. Suliffeqarfittut Inatsisartut inatsisaat naapertorlugu paasineqassaaq sunaluunniit pisortat suliffiutaat, tak. imm. 2, imaluunniit namminersortut suliffiutaat, tak. imm. 3.

Imm. 6. Sulisutut Inatsisartut inatsisaat naapertorlugu paasineqassaaq inuk kinaluunniit, pisortanit atorfinitsitaasooq, tak. imm. 1, imaluunniit suliffeqarfimmit, tak. imm. 5, Kalaallit Nunaannilu sulianik ingerlatsisoq. Sulisuusutut isigineqassaaq kinaluunniit inuk, inuk taanna Kalaallit Nunaanni akileraartussaappat akileraartussaangippalluunniit.

Imm. 7. Neqerooruteqartut Inatsisartut inatsisaat naapertorlugu paasineqassaaq suliffeqarfik sunaluunniit, tak. imm. 5, imaluunniit suliffeqarfiit ataatsimoorlutik pisortat suliariumannittussarsiuussineranni neqerooruteqartut, tunisassanut tunngasumik imaluunniit kiffartuussinermi suliassanut neqeroortitsineranni.

Imm. 8. Naalakkersuisut ersarinnerusunik aalajangersagaliorsinnaapput aamma aalajangiisinnaapput taaguutit imm. 1-7-imi pineqartut ersarinnerusunik isumaat pillugit.

§ 3. Najugaqavissoq Inatsisartut inatsisaanni ima paasineqassaaq, inuk kinaluunniit tulluuttuni piumasaqaammik 1-mik arlalinnilluunniit naammassinnittoq:

1) Inuk Kalaallit Nunaanni inunngortoq, aamma inuunermini ukiuni 5-imi siullerni Kalaallit Nunaanni aalajangersimasumik najugaqartuusimasooq.

- 2) Inuk ukiut kingulliit 10-t iluini ukiuni arfineq-marlunni Kalaallit Nunaanni aalajangersimasumik najugaqarsimasoq.
- 3) Inuk katissimavoq imaluunniit aalajangersimasumik sivikinnerpaamik ukiumik 1-imik sivilissusilimmik inummut nr. 1-imi imaluunniit nr. 2-mi piunasaqaatinik naammassinnittumut inooqateqarnerminik uppersaasinnaasoq.
- 4) Inuk pissutsinit nr. 1-imit 3-mut nalunaarneqartunit allaanerusunik pissuteqarluni immikkut Kalaallit Nunaannut attuumassuteqartoq.

Imm. 2. Imm. 1, nr. 2 malillugu inuup Kalaallit Nunaanni aalajangersimasumik najugaqarsimaneranut piffissap nalunaarsornerani ilinniagaqarnissaq siunertarlugu Kalaallit Nunaata avataani inuup najugaqarsimaneera ilanngunneqassaaq.

Imm. 3. Naalackersuisut ersarinnerusunik aalajangersaasinnaapput aamma aalajangiisinaallutik, kina imm. 1-imi nr. 4 naapertorlugu immikkut Kalaallit Nunaannut attuumassuteqartuunersoq pillugu.

§ 4. Ilinniartutut imaluunniit sungiusartutut Inatsisartut inatsisaat naapertorlugu paasineqassaaq kinaluunniit inuk nalinginnaasumik akuerisaasumik ilinniakkamik ingerlataqartoq, taamaalillunilu tassunga atatillugu ilinniartutut imaluunniit sungiusartutut suliamik ingerlataqartussa, imaluunniit sungiusartuusassa.

Imm. 2. Ilinniartoq imaluunniit sungiusartoq, tak. imm. 1, aamma tassaavoq inuk kinaluunniit suliffinnut aalajangersimasunik siunertaqartunut bachelorinnngorniarluni ilinniakkamik ingerlataqartoq, tamatumunngalu atatillugu pisortani imaluunniit suliffeqarfimmi sungiusaammik sulineramik ingerlatsisussa.

Imm. 3. Akissarsiarititat ataatsimoortutut Inatsisartut inatsisaat naapertorlugu paasineqassapput aningaasat inunnut tamakkiisumik imaluunniit ilaannakuusumik Kalaallit Nunaanni akileraartussaasunut akilerneqartartut, nammineq sulinermi aningaasarsiat tamaasa, namminersorlunilu suliffimmi isertitat.

Imm. 4. Ilinniartoqarnermik aamma sungiusartoqarnermik anguniakkat paasineqassapput pissutsit aalajangersimasut atuuttut illuatungaani kissaataasut najugaqavissunik amerlassusilikkanik ilinniartunik imaluunniit sungiusartunik sulisitaqarnissat, kalaallit suliffeqarfiutaanni namminersortumi, aamma illuatungaani suliffeqarfiup ullorsiutit ukiuanni akissarsianut aningaasartuutai ataatsimoortut, tak. § 11.

Imm. 5. Naalackersuisut ersarinnerusunik aalajangersagaliorsinnaapput aalajangiisinaallutillu akissarsiarititat ataatsimoortut isumaat imm. 1-4-mi pineqartut pillugit.

Atuuffia

§ 5. Inatsisartut inatsisaat atuutissaaq pisortanut imaluunniit suliffeqarfinnut pisortat imaluunniit suliffeqarfik sulisoqarpat suliamik ataatsimik arlalinnilluunniit ingerlatsisartunik:

- 1) Kalaallit Nunaanni nunami suliat ingerlatat.
- 2) Kalaallit Nunaata imartaani suliat ingerlatat.

- 3) Ingerlatat aningaasarsiornikkut Kalaallit Nunaannut killeqarfiup iluani Namminersorlutik Oqartussat oqartussaaffigisaannut ilaasuni.
- 4) Ingerlatat Kalaallit Nunaata toqqaviata ilaaniippata, Kalaallit Nunaata oqartussaaffigisaani.
- 5) Ingerlatsineq nioqqutissanik tunisisarnermik kiffartuussinermilluunniit imaqartoq Kalaallit Nunaanni sullitamut 1-imut arlalinnulluunniit.

Imm. 2. Taamaattorli Inatsisartut inatsisaat taamaallaat atuutissaaq pisortanut imaluunniit suliffeqarfimmut sulisoqartumut ingerlatanik imm. 1, nr. 1-imi eqqaaneqartunik, sulisut sulianik katillugit ukiumi ilivitsumi minnerpaamik qaammammi 1-imi ingerlassaqartarpata.

Imm. 3. Taamaattorli Inatsisartut inatsisaat taamaallaat atuutissaaq pisortanut imaluunniit suliffeqarfimmut sulisoqartumut imm 1, nr. 2, 3 imaluunniit 4-mi sulianik taaneqartunik ingerlassaqartunik, sulisut sulianik katillugit ukiumi ilivitsumi minnerpaamik qaammatini 3-ni sulianik ingerlassaqartillugit.

Imm. 4. Naalackersuisut ersarinnerusunik aalajangersagaliorsinnaapput Inatsisartut inatsisaata imm. 1-imit 3-mut pineqartuni atuuffiani, tamatumani aamma imaattuni:

- 1) Ingerlatatut taasani imm. 1, nr. 1-imiit 5-imut.
- 2) “Namminersorlutik Oqartussat oqartussaaffigisaannut ilaasut” imm. 1, nr. 3 aamma 4-mi.
- 3) “Tunisisarnermik kiffartuussinermilluunniit imaqartoq Kalaallit Nunaanni sullitamut 1-imut arlalinnulluunniit” imm. 1, nr. 5-imi.
- 4) Piffissap naatsorsorneqarnera imm. 2 imaluunniit 3 tunngavigalugit, sulisuusiq ingerlatamik arlalinnilluunniit imm. 1, nr. 1-4-mi pineqartunik ingerlatsippat.

§ 6. Inatsisartut inatsisaat atuutinngilaq Kalaallit Nunaanni eqqartuussivinni aamma naalagaaffiup Kalaallit Nunaanni oqartussaasuini.

*Atorfeqartitsinissamut piumasaqaatit najugaqavissunik
ilinniartunik aamma sungiusartunik*

§ 7. Aalajangersakkat kapitali 4 naapertorlugu kingunerippassuk pisortat imaluunniit pisortat suliffiutaat pisussaaffeqartoq ilinniartunik imaluunniit sungiusartunik atorfeqartitsinissamut, taava pisussaaffik taanna naammassineqassaaq najugaqavissunik ilinniartutut imaluunniit sungiusartutut sulisoqarnikkut.

Imm. 2. Isumaqatigiissuteqarnikkut aalajangersakkat neqeroortitsereernikkut kapitali 7 naapertorlugu kingunerippassuk suliffeqarfik pisussaasoq ilinniartunik imaluunniit sungiusartunik sulisoqarnissamut, taava pisussaaffik taanna naammassineqassaaq najugaqavissunik ilinniartutut imaluunniit sungiusartutut sulisoqarnikkut.

Imm. 3. Isumaqatigiissutaasuni aalajangersakkat neqeroortitsereernikkut suliassut kapitali 8 naapertorlugu kingunerippassuk suliffeqarfik pisussaasoq ilinniartunik imaluunniit sungiusartunik atuisussaasoq suliassat ingerlanneranni, isumaqatigiissutaasut naapertorlugu pilersitsinerni aamma pilersitanik tunniussinerni, pisussaaffik naammassineqassaaq najugaqavissunik ilinniartutut imaluunniit sungiusartutut sulisoqarnikkut.

*Ilinniartunik sungiusartunillu sulisoqarnermi imaluunniit atuinermi
aalajangersakkanut allanut attuumassuteqartut*

§ 8. Inatsisartut inatsisaanni aalajangersakkat atortinneqassapput, naak ilinniartunik imaluunniit sungiusartunik atorfinittitsisarnerni imaluunniit atuisarnerni aalajangersakkat allat aamma tamatumunnga atatillugu aamma atortinneqaraluartut. Pisortat aamma suliffeqarfiit pisussaaffitik naammassisassavaat Inatsisartut inatsisaat naapertorlugu, naak aamma aalajangersakkat allat naapertorlugit pisussaaffitik naammassigaluarlugit, aamma pisussaaffitik aalajangersakkat allat naapertorlugit annikinnerugaluartut imaluunniit annertunerugaluartut, imaluunniit Inatsisartut inatsisaat una naapertorlugu pisussaaffiusunit allaanerugaluartut.

Imm. 2. Aalajangersakkat allat, imm. 1-imi eqqaaneqartut, ilaatigut tassaapput inatsisini allani aalajangersakkat, akuersissutit, akuersinerit pisassallu Naalackersuisunit nalunaarutigineqarsimasut aamma Naalackersuisunit isumaqatigiissutigineqarlutik atsiorneqarsimasut.

Kapitali 2

*Ilinniartunik sungiusartunillu atorfinitsitsinernut tunngatillugu
pisussaaffiit nalinginnaasut*

§ 9. Pisortat imaluunniit suliffeqarfiup ataatsimut isigisumik anguniassavaa ilinniartunik aamma sungiusartunik sulisoqarnissaq sapinngisamik annertunerpaamik, aammalu iliuusissat tamatumunnga naleqquttut iliuuserisassallugit Inatsisartut inatsisaat naapertorlugu ilinniartunik aamma sungiusartunik sulisoqarumalluni.

Sulisussarsiortarnerit

§ 10. Aalajangersagaq uani § 10-mi atortuutinneqassaaq pissutsini imaattuni:

- 1) Kapitali 4-mi aalajangersakkat kingunerisaannik pisortat imaluunniit pisortat suliffiutaat pisussaappat ilinniartunik imaluunniit sungiusartunik sulisitsinissamut.
- 2) Isumaqatigiissutaasuni aalajangersakkat, aalajangersarneqartut neqeroortitsinikkut kapitali 7 tunngavigalugu kingunerippassuk suliffeqarfik pisussaasoq ilinniartunik imaluunniit sungiusartunik sulisitsinissamut.
- 3) Isumaqatigiissutaasuni aalajangersakkat aalajangersarneqartut nereroortitsereernikkut kapitali 8 naapertorlugu kingunerippassuk suliffeqarfik pisussaasoq ilinniartunik imaluunniit sungiusartunik atuinissaminut, suliassanik suliaqarnermini, pilersitsinermi aamma isumaqatigiissutaasut naapertorlugit pilersitanik tunniussinermi.

Imm. 2. Pisortat pisussaaffiligaasut imaluunniit suliffeqarfik tamanut takusassiissapput atorfinnik imaluunniit atorfinnik arlaqartunik inuttassarsiuunneqartunik, aammalu

pisariaqartunik naleqquttunillu allanik iliuuseqassallutik ilinniartunik aamma sungiusartunik sulisitsinissaq siunertaralugu.

Imm. 3. Atorfimmik inuttassarsiuussamik allagarsiilluni saqqummiussineq pisassaaq saqqummiussinissanut naleqqunnerpaani, qinnuteqarnissamut soqutiginnissinnaasunut tunngatillugu.

Imm. 4. Pisortat pisussaaitaasut imaluunniit suliffeqarfik tamanut allagarsiilluni inuttassarsiuussisassaaq minnerpaamik ukiumut ataasiarluni. Kiisalu pisortat imaluunniit suliffeqarfik pisussaaitaasoq tamanut allagarsiissaaq atorfimmik arlalinnilluunniit inuttassarsiuussilluni, pisussaaffiup ilinniartoqarnissamut imaluunniit sungiusartoqarnissamut naammassineqarnissaata tamanna pisariaqartippagu.

Imm. 5. Allagarsiilluni inuttassarsiuineq tamanut naleqquttumi minnerpaamik qaammammi 1-imi takusassiarineqassaaq, ilinniartunut sungiusartunullu suliffissat inuttassarsiuinermi pineqartut piffissami tassani ilinniartunik sungiusartunillu atorfinitsitsinikkut inuttalerneqangippata. Ilinniartunut ilinniarfissat aamma sungiusartunut sungiusarfissat allagarsiilluni inuttassarsiuinermi ilaasut piffissami pineqartumi inuttalerneqangippata inuttassarsiuineq qaammatit 6-ikkaartumik tamanut takusassiarineqartassaaq.

Imm. 6. Pisortat imaluunniit suliffeqarfik pisussaaffeqartoq tamanut ammasumik allagarsiinissamik naammassinnittariaqangilaq, pisortat imaluunniit suliffeqarfik ilinniartunik imaluunniit sungiusartunik sulisitsinermigut pisussaaffimminik naammassinnissimappat.

Imm. 7. Naalackersuisut ersarinnerusunik aalajangersagaliorsinnaapput inuttassarsiuussinermik arlalinnilluunniit tamanut takusassiisarnissamut atatillugu, tamatumani aamma qanoq annertutigisumik pisortat imaluunniit suliffeqarfiup inuttassarsiuussamik arlalinnilluunniit tamanut saqqummiussisarnissaa pisussaaffiunersoq pillugu, tamatumani aamma atorfiup inuttassarsiuussap imarisassai, aaqqissuunnissaa allallu pillugit. Naalackersuisullu aamma ersarinnerusunik aalajangersagaliorsinnaapput pisussaaffik pillugu, iliuusissanillu naleqquttunik allanik iliuuseqartarnissat pillugit, ilinniartunik aamma sungiusartunik pisortat aamma suliffeqarfiup atorfinitsisarnermi sulisitsisarnermilu pisussaaffii pillugit, tamatumani aamma qanoq annertutigisumik pisortat imaluunniit suliffeqarfik pisussaaffeqarnersoq ilinniartuusinnaasut sungiusartuusinnaasullu oqaloqatigiartortassanera, tamatumani pisussaaffiit imarisassaat ersarinnerusut pillugit.

Kapitali 3

Ilinniartunik aamma sungiusartunik atorfinitsisarnerni anguniakkat kalaallit suliffeqarfiini namminersortuni aamma suliffeqarfiit bonusisiassaat

§ 11. Ilinniartoqarnissamut aamma sungiusartoqarnissamut anguniakkat ullorsiutit ukiuanni aalajangersarneqartassapput ullorsiutit ukiuanni aningaasanut inatsimmi oqaasertaliussatigut, takuuk § 4, imm. 4.

Imm. 2. Naalackersuisut ersarinnerusunik aalajangersagaliorsinnaapput ilinniartut aamma

sungiusartut amerlassusissaannut anguniakkanik, imm. 1 naapertorlugu, tamatumani aamma ilinniartunik aamma sungiusartunik kalaallit suliffeqarfiini namminersortuni assigiinngitsuni aamma inuussutissarsiutini assigiinngitsuni il.il. anguniagassanut tunngasunik.

§ 12. Naalackersuisut ilinniartoqarnermi aamma sungiusaammik sulisoqarnermi bonusisiassanik kalaallit namminersortut suliffeqarfiinut agguaassisassapput akiliisarlutillu, suliffeqarfik ullorsiutit ukiuanni suliffeqarfimmut ilinniartut aamma sungiusartut amerlassusissaattut anguniagassatut aalajangikkanit amerlanerusunik ilinniartunik imaluunniit sungiusartunik atorfeqartitsisimappat, tak. § 11.

Imm. 2. Aningaasanut inatsimmi ullorsiutit ukiuanni aningaasanik annertussusiliisoqartassaaq ilinniartoqarnermut sungiusartoqarnermullu bonusisiassatut. 2018-imut ilinniartoqarnermut sungiusartoqarnermullu bonusisiassatut ataatsimut immikkoortitat 5 mio. kr.-nik annertussusilerneqassapput. Ilinniartoqarnermut sungiusartoqarnernullu bonusisiassatut immikkoortitat kalaallit suliffeqarfiinut namminersortunut ilinniartoqartunut sungiusartoqartunullu bonusit akiliutigineqartassapput, ullorsiutit ukiuanni suliffeqarfimmut ilinniartut aamma sungiusartut amerlassusissaattut anguniagassatut aalajangikkanit amerlanerusunik ilinniartunik imaluunniit sungiusartunik sulisunik atorfeqartitsisimasunut, tak. § 11.

Imm. 3. Imm. 1 naapertorlugu ilinniartoqarnermut aamma sungiusartoqarnermut kalaallit suliffeqarfiisa bonusisiassaat naapertuuttumik naatsorsorneqartassapput, tak. imm. 2, aningaasanut inatsimmi bonusisiassatut immikkoortitaasut tunngavigalugit. Kalaallit suliffeqarfiutaata namminersortup naapertuuttumik pissarsiassai ilinniartut aamma sungiusartut atorfinitsinneqartussat amerlassusissaattut anguniagaasunut naleqqiullugu ilinniartut aamma sungiusartut atorfinitsinneqartut anguniagaasunit qassinik amerlanerunerat tunngavigalugit naatsorsorneqartassaaq, tak. § 11, aamma ilinniartut sungiusartullu kalaallit suliffeqarfiini namminersortuni tamarmiusuni atorfinitsinneqartussat amerlassusissaattut anguniagaasunut naleqqiullugu ilinniartut aamma sungiusartut atorfinitsinneqartut qassinik amerlanerunerat tunngavigalugit, tak. § 11. Ilinniartoqarnermut aamma sungiusartoqarnermut kalaallit suliffeqarfiisa namminersortut pisinnaatitaasut bonusitut pissarsiassaat ataatsimut katinnerat aningaasanik inatsimmi annertussusissatut aalajangersakkaniit annerusinnaanngillat, tak. imm. 2.

Imm. 4. Ilinniartoqarnermut aamma sungiusartoqarnermut bonusisiassat kalaallit suliffeqarfiinut namminersortunut, imm. 1 naapertorlugu, suliffeqarfimmut ilinniartut aamma sungiusartut amerlassusissaattut anguniagassatut aalajangikkanik amerlanerusunik atorfinitsitsisimappata ilinniartumut imaluunniit sungiusartumut ataatsimut amerlanerussutaasumut ukunanga bonusisiassanit annerusinnaanngillat, tak. § 11:

1) 30.000 kr.-t 2018-imut.

2) Ullorsiutit ukiuinut tulliuuttunut tamanut annertussusilerneqartassaaq bonusisiassat aningaasartassaat annertunerpaat ilinniartukkaarlugu imaluunniit sungiusartukkaarlugu, ilinniartut aamma sungiusartut atorfinitsinneqartussat amerlassusissaattut anguniagaasunut

naleqqiullugu ilinniartut aamma sungiusartut atorfinitsinneqartut qassinik amerlanerunerat tunngavigalugit, ullorsiutit ukiuannut aningaasanut inatsimmi oqaasertaliussakkut.

Imm. 5. Naalackersuisut ersarinnerusunik aalajangersagaliorsinnaapput, ilinniartunut aamma sungiusartunut bonusisiassatut ullorsiutit ukiuanni immikkoortitat, naatsorsuusiortarneq, agguaassisarneq aamma ilinniartunut aamma sungiusartunut bonusisiat akilerneqartarneri pillugit, kalaallit suliffeqarfiinut namminersortunut aamma ilinniartoqarnermut sungiusartoqarnermullu bonusisiassaasinnaasut annertussuserisinnaasaat imm. 1-4 naapertorlugu pillugit.

Imm. 6. Imm. 5 naapertorlugu aalajangersaannginnermi Naalackersuisut aalajangersagassanut atatillugu suliffeqarnermi illuatungeriinnik tusarniaasassapput.

Kapitali 4

Atorfinitsisarnermi piumasagaatit pisortanut aamma pisortat suliffiutaanni

§ 13. Pisortat imaluunniit pisortat suliffiutaat pisussaapput ilinniartoqarnissamut imaluunniit sungiusartoqarnissamut ullorsiutit ukiuanni, pisortat imaluunniit suliffeqarfik agguaqatigiissillugu minnerpaamik 12-inik sulisoqarsimappat, ullorsiutit ukiuata siuliani qaammatini tamani, taamaattoq tak. § 15, imm. 3.

Imm. 2. Pisortat imaluunniit pisortat suliffiutaat pisussaataaangilaq ilinniartunik imaluunniit sungiusartunik sulisoqarnissamut ullorsiutit ukiuanni imm. 1 naapertorlugu, pisortat imaluunniit suliffeqarfik akuerineqarsimanngippat akuerineqarsinnaananilu sungiusartarfittut, inuussutissarsiutinut ilinniartitaanernut inuussutissarsiutinilu ilinniartitaanerni pikkorissartitsisarnermut Inatsisartut inatsisaat naapertorlugu kingusinnerusukkut allannguuteqartoq tunngavigalugu.

Imm. 3. Naalackersuisut ersarinnerusunik aalajangersagaliorsinnaapput pisortat imaluunniit pisortat suliffeqarfiutaata ilinniartoqarnissamut imaluunniit sungiusartoqarnissamut ullorsiutit ukiuanni imm. 1 aamma 2 naapertorlugu pisussaaffii pillugit.

§ 14. Ilinniartut imaluunniit sungiusartut pisortat imaluunniit pisortat suliffeqarfiutaata sulisorissallugit ullorsiutit ukiuanni pisussaaffigisai §§ 13, 15 aamma 16 naapertorlugit, naatsorsorneqassapput pisortat imaluunniit suliffeqarfiup agguaqatigiissillugu qaammatini tamani sulisorisimasai ullorsiutit ukiuata siuliani tunngavigalugit, tak. § 13, imm. 1.

Imm. 2. Naatsorsuinnermi imm. 1 naapertorlugu pisortat imaluunniit suliffeqarfiup ullup ilaannaani suliffiusartut atorfiit ulloq naallugu suliffiit nalinginut naatsorsussavai.

Imm. 3. Imm. 1 malillugu sulisut agguaqatigiissillugit amerlassusaat naatsorsugaasut kisitsit ilivitsuunnngippat kisitsimmut ilivitsumut qummut qaninnerpaamut inissinneqassaaq.

§ 15. Pisortat imaluunniit pisortat suliffeqarfiat ullorsiutit ukiuanni pisussaavoq minnerpaamik ilinniartumik sungiusartumilluunniit ataatsimik sulisitsinissamut sulisuusut 12-iuneri tamaasa, pisortat imaluunniit suliffeqarfiup agguaqatigiissillugu qaammatini tamani

ullorsiutiut ukiuata siuliani sulisorisimasai tunngavigalugit, tak. § 14, taamaattoq tak. imm. 2 aamma 3 aamma § 16.

Imm. 2. Pisortat imaluunniit pisortat suliffiutaat taamaallaat ullorsiutit ukiuata ilaannaani sulianik ingerlatsisarpata, taava pisortat imaluunniit suliffeqarfiup imm. 1 naapertorlugu pisussaaffini naammassisinnaavaa ilinniartunik imaluunniit sungiusartunik naapertuuttumik amerlassusilinnik ullorsiutit ukiuanni tassani atorfeqartitsinermigut, pisortat imaluunniit suliffeqarfiup agguaqatigiissillugu ilinniartuq imaluunniit sungiusartuq ataaseq sulisuusut 12-iuneri tamaasa atorfeqartittaruniuk, pisortat imaluunniit suliffeqarfiup agguaqatigiissillugu ullorsiutit ukiuata siuliani qaammatini tamani atorfeqartittarsimagunigit.

Imm. 3. Pisortat imaluunniit pisortat suliffeqarfiat pisussaannngilaq ilinniartunik imaluunniit sungiusartunik sulisoqarnissamut imm. 1 naapertorlugu, imatut annertussuseqartunik sulisut amerlassusaat pisortat imaluunniit suliffeqarfiup agguaqatigiissillugu qaammatini tamani ullorsiutit ukiuanni sulisorisimasani tunngavigalugit, taakkua amerlaneruppata imaluunniit ikinneruppata sulisuusunit pisortat imaluunniit suliffeqarfiup agguaqatigiissillugu ullorsiutit ukiuata siuliani qaammatit tamaasa sulisorisimasaaniit. Pisuni eqqaaneqartuni pisussaaffik naatsorsorneqartassaaq ilinniartunik imaluunniit sungiusartunik sulisoqarnissamut imm. 1 naapertorlugu, ullorsiutit ukiuanni kingumoortumik sulisut amerlassusaat tunuliaqutaralugit, pisortat imaluunniit suliffeqarfiup agguaqatigiissillugu sulisorisimasai qaammatini tamani ullorsiutit ukiuanni pineqartumi.

Imm. 4. Naatsorsuusiordermi ilinniartut aamma sungiusartut qassit pisortat imaluunniit pisortat suliffiutaata sulisorinikuusai imaluunniit sulisorisai, pisortat imaluunniit suliffeqarfiup ilanngullugit naatsorsuussinnaavai suliffinnut aalajangersimasumik siunertalinnut bachelorinnngorniarluni ilinniartitaanerni ilinniagaqartut, pisortani imaluunniit suliffeqarfimmi ilinniakkaminnut atatillugu sungiusaammik suliamik ingerlataqartut. Pisortat imaluunniit suliffeqarfiup aamma ilanngullugit naatsorsuussinnaavai ilinniagaqartut allat, ilinniakkamik nalinginnaasumik akuerisaasumik ingerlatsisut, imaluunniit ilinniakkamik akuerisamik ingerlatsisut pisortani imaluunniit suliffeqarfimmi.

Imm. 5. Pisortat imaluunniit pisortat suliffiutaat ullorsiutit ukiuanni pisussaataaangilaq ilinniartut imaluunniit sungiusartut 52-init amerlanerusut atorfeqartissallugit, taamaattoq tak. § 16.

Imm. 6. Naalackersuisut ersarinnerusunik aalajangersagaliorsinnaapput aammalu aalajangiisinnaallutik pisortat imaluunniit pisortat suliffiutaata suliffinnut aalajangersimasumik siunertalinnut bachelorinnngorniarluni ilinniartitaanerni ilinniagaqartut ilinniagaqartullu allat imm. 4-mi eqqaaneqartut naatsorsuordermi ilinniartunik aamma sungiusartunik qassinik sulisoqarsimaneri imaluunniit sulisoqarneri pillugit ilanngunneqarsinnaaneritut tunngatillugu. Naalackersuisut ilaatigut ersarinnerusunik aalajangersagaliorsinnaapput aammalu aalajangiisinnaallutik, ilinniakkat suut imm. 4 naapertorlugu akuerineqarsinnaanersut pillugit.

§ 16. Naalackersuisut ukiut tamaasa kingusinnerpaamik novembarimi aalajangersartassavaat, ullorsiutit ukiuanni tulliuuttumi pisortat imaluunniit pisortat suliffiutaat ullorsiutit ukiuata siuliani, tak. § 14, agguaqatigiissillugu 624-nit amerlanerusunik sulisoqarsimasut ilinniartunik imaluunniit sungiusartunik 52-init amerlanerusunik sulisitissanersut.

Imm. 2. Aalajangersakkanik aalajangiinerit imm. 1 naapertorlugu, ilaatigut pisarput ileqqussat nalinginnaasut imaattut tunngavigalugit:

- 1) Pisussaaffik ilinniartunik imaluunniit sungiusartunik aalajangersimasunik amerlassusilinnik sulisoqarnissamut aalajangersarneqartassaaq pisortani imaluunniit suliffeqarfimmi agguaqatigiissillugu sulisuusunut ullorsiutit ukiuata siuliani naapertuuttunik, tak. § 14.
- 2) Sulisutut atorfeqartitat amerlanerit nassataraat ilinniartunik imaluunniit sungiusartunik amerlanernik atorfeqartitaqarnissamut pisussaaffik.
- 3) Sulisorisat amerleriarnertat tamatumunnga naapertuuttumik kinguneqassaaq ilinniartut imaluunniit sungiusartut amerleriarnernannik, pisortat imaluunniit suliffeqarfiup sulisorissallugit pisussaaffigisaani.

Imm. 3. Imm. 1 malillugu aalajangersakkanik aalajangiineq sioqqullugu Naalackersuisut aalajangersakkat aalajangernerit pillugit suliffeqarnermi illuatungeriinnik tusarniaasassapput.

Immikkut akuersissutit

§ 17. Naalackersuisut immikkut akuersissuteqarnissamut qinnuteqaammik tunngaveqartumik aalajangiisinnaapput, pisortat imaluunniit pisortat suliffeqarfiutaat tamakkiisumik ilaannakuusumilluunniit pisussaajunnaarsinneqassasoq ilinniartunik sungiusartunilluunniit sulisoqarnissamut §§ 13-16 naapertorlugit, imaluunniit pisortat imaluunniit suliffeqarfik ikinnerusunik ilinniartunik sungiusartunilluunniit §§ 13-16 naapertorlugit aalajangersagaasunit sulisoqarsinnaasoq.

Imm. 2. Immikkut akuersissuteqarnissamut qinnuteqaat makkuninnga imaqassaaq:

- 1) Nalunaarussiaq kingulleq § 39 naapertorlugu tunniunneqarsimasoq.
- 2) Paasissutissat aamma uppernarsaatit pisortat imaluunniit suliffeqarfiup ilinniartunik imaluunniit sungiusartunik sulisoqarnissamut piumasaqaatinik §§ 13-16 naapertorlugit naammassinnissinnaanginneranut. Uppernarsaatinut ilaatigut ilanngunneqassapput atorfiit inuttassarsiuussimasat pillugit allagarsiuussat, iliuusaasimasunullu allanut ilinniartunik imaluunniit sungiusartunik sulisoqarnissamut atatillugu, tak. § 10.

Imm. 3. Immikkut akuersissut imm. 1 malillugu ataasiakkaartumik ukioq ataaseq tikillugu nalunaarutigineqarsinnaavoq, taamaattorli immikkut akuersissutip nalunaarutiginerata ukiuata naanissaa sinnernagu.

Imm. 4. Naalackersuisut ersarinnerusunik aalajangersagaliorsinnaapput immikkut akuersissuteqartarnermut imm. 1 naapertoorlugu, aamma immikkut akuersissuteqartarnermut imm. 1 aamma 2 naapertorlugit.

Kapitali 5

Ilinniartunut sungiusartunullu akiliut pisortanit aamma pisortat suliffiutaanniit

§ 18. Naalakkersuisut pisortanut imaluunniit pisortat suliffiutaannut pisussaaffiliisarput ilinniartunut sungiusartunullu akiliummik Ilinniartunut Sungiusartunullu Aningaasaateqarfimmut akiliuteqartarnissaat pillugu, tak. § 20, pisortat imaluunniit suliffeqarfik §§ 13-16 naapertorlugit ilinniartoqarpata sungiusartunilluunniit sulisoqarpat piumasarineqartunit ikinnerusunik, taamaattoq tak. § 17.

Imm. 2. Ilinniartunut sungiusartunullu akiliut annertussusilikkamik ataaniittumik akilerneqartassaaq, pisortat imaluunniit suliffeqarfiup §§ 13-16 naapertorlugit sulisorisassaanut, tak. taamaattoq § 17, kisiannili ullorsiutit ukiuanni sulisorinngisaanut:

- 1) 2018-imut akiliut akiliutaasussaq 30.000 kr.-nik annertussuseqarpoq.
- 2) Ullorsiutit ukiuinut tullinnguuttunut tamanut akiliut akiliutaasussaq ullorsiutit ukiuannut pineqartumut aningaasanut inatsimmi oqaasertaliussani nalunaarsuutikkut aalajangerneqartassaaq.

Imm. 3. Pisortat imaluunniit pisortat suliffiutaat ullorsiutit ukiuata ilaani ilinniartoqarsimappat imaluunniit sungiusartoqarsimappat §§ 13-16-imi piumasarineqartuniit ikinnerusunik, taamaattoq tak. § 17, Naalakkersuisut pisortanut imaluunniit suliffeqarfimmut pisussaaffiliissapput ilinniartut aamma sungiusartut pillugit akiliummik akiliuteqarnissaannik, tak. imm. 2. qaammammut imaluunniit qaammatit 12-it iluanni ilinniartunik sungiusartunilluunniit sulisoqarfiusimanngitsunut naapertuuttumik. Ilinniartunut aamma sungiusartunut akiliut sulisorisimasassaraluit ikinnerussutaannut naapertuuttoq ilinniartukkaartumik sungiusartukkaartumillu akilerneqassaaq.

Imm. 4. Ilinniartunut sungiusartunulluunniit akiliut akiligassanngortinneqartoq pisortanit imaluunniit pisortat suliffiutaannit akilerneqassaaq Ilinniartunut Sungiusartunullu Aningaasaateqarfimmut, takuuk § 22, kingusinnerpaamik sapaatit akunnerisa 8-t qaangiunneranni pisortanut pisortalluunniit suliffiutaannut pisusaaffittut nalunaarutigineqarneraniit.

Imm. 5. Naalakkersuisut ersarinnerusunik aalajangersagaliorsinnaapput imm. 1-imit 4-mut tunngasuni, tamatumani aamma makkununnga tunngasuni:

- 1) Peqqussuteqartarneq ilinniartunut aamma sungiusartunut akiliummik akiliinissamik, tak. imm. 1.
- 2) Ilinniartunut aamma sungiusartunut akiliummik akiliuteqartarnermut, tak. imm. 2-4.
- 3) Ilinniartunut aamma sungiusartunut akiliummik kingusinaartumik akiliinernut ernianik akiliuteqartarnermut.
- 4) Akiliummik akiliuteqarnermik imalunniit akiliisitsinermik, ilinniartunut aamma sungiusartunut akiliummik akiliisitsiniartarnermi aningaasartuutitut matussutissanik.

Kapitali 6

Ilinniartunut Sungiusartunullu Aningaasaateqarfik

§ 19. Ilinniartunut aamma sungiusartunut akiliut akilerneqassaaq Ilinniartunut aamma Sungiusartunut Aningaasaateqarfimmut elektroniskiusumik aningaaserivimmi kontomut nuussinikkut, Naalakkersuisunit aalajangersakkat imaluunniit nalunaarutaasut naapertorlugit, taamaattoq tak. imm. 2.

Imm. 2. Ilinniartunut aamma sungiusartunut akiliut akilerneqarsinnaavoq aningaasanut inatsimmi kontomit kontomut nuussinikkut, tamatuma ajornannginnera naapertorlugu.

§ 20. Naalakkersuisut Ilinniartunut Sungiusartunullu Aningaasaateqarfik aningaasanut inatsimmi immikkut ittutut kontotut pingaarnertut pilersissavaat.

Imm. 2. Aningaasaateqarfiup isertitai, aningaasartuutai aamma aningaasaatai, isertitanit, aningaasartuutinit aningaasaatinillu Naalakkersuisunut atasut sinnerinit immikkoortillugit nalunaarsorneqarlutillu pigineqassapput.

§ 21. Naalakkersuisut Ilinniartunut aamma Sungiusartunut Aningaasaateqarfimmik aqutsisuupput, tamatumani aamma pissutsini imaattuni:

- 1) Aningaasaateqarfiup ilinniartunut sungiusartunullu akiliutinik tiguisarnera, tak. § 22.
- 2) Aningaasaateqarfiup akiliuteqartarnera tapiissutinik ilinniarfinni sungiusarnernut aamma assingusunik ilinniakkanut sungiusarnernik ingerlatsinernut piginnaasanik ineriartortitsinernullu ilinniartunut aamma sungiusartunut sammititanut, inuussutissarsiutinut ilinniarfinni ilinniarfinnilu assingusuni, tak. § 23, imm. 1, 2, 4 aamma 5.
- 3) Aningaasaateqarfiup Kalaallit Nunaanni pisortat inuussutissarsiutinut ilinniarfiutaannik assigisaannillu sanaartornernut allilerinernulluunniit sanaartugassanut tapiissutai, takuuk § 23, imm. 3-5.
- 4) Aningaasaateqarfiup Kalaallit Nunaanni ilinniartunut aamma sungiusartunut pisortat ilinniartunut inissiaataannik assigisaannillu sanaartornernut allilerinernulluunniit sanaartugassanut tapiissutai, takuuk § 23, imm. 3-5.
- 5) Aningaasat ukiuannut naatsorsuiffimmut nunatta karsiata naatsorsuutaata ilaatut aningaasaateqarfimmut naatsorsuusiortarneq.

Imm. 2. Naalakkersuisut isumagisassavaat nunatta karsiata naatsorsuutaani ukiumi aningaasaliiffiusumi ilaqassasoq immikkut naatsorsuusiukkanik aningaasaateqarfiup isertitaanik, aningaasartuutaanik aamma aningaasaataanik ukiumi naatsorsuiffiusumi naatsorsuusiortarnissaq, aamma ukiumi naatsorsuusiortarnissaq aningaasaateqarfimmut immikkut naatsorsuusiortarnissaq.

§ 22. Ilinniartunut sungiusartunullu akiliummik Ilinniartunut Sungiusartunullu Aningaasaateqarfimmut akilerneqartoqartassaaq, tak. § 20, Naalakkersuisunut akiliuteqarnikkut.

Imm. 2. Ilinniartunut sungiusartunullu akiliut Ilinniartunut Sungiusartunullu Aningaasaateqarfimmut akilerneqartoq nalunaarsorneqartassaaq aningaasanut inatsimmi aningaasaateqarfiup immikkut kontoani pingaarnermi, takuuk § 20, imm. 1.

§ 23. Ilinniartunut Sungiusartunullu Aningaasaateqarfiup aningaasaatai taamaallaat Kalaallit Nunaanni ilinniartunut sungiusartunullu sulianik ilinniarfimmi assingisaattulluunniit ilinniagaqarfiusumi sungiusarnermut imaluunniit assingusumik tigussaasunik ilinniagaqarnermut piginnaasaanillu ineriartortitsinermi aningaasartuutit matussusernissaannut akiliutiginnissaannullu atorneqassapput, taamaattorli tak. imm. 2 aamma 3. Taamaattorli aningaasartuutit taamatut ittut taamaallaat matussuserneqassapput Kalaallit Nunaanni sulianik ilinniarfimmut imaluunniit assingusutut ilinniagaqarfiusumut ingerlatsinermut aningaasartuutaappata. Aningaasartuutit taamatut ittut taamatut akiliuteqarnermut imaluunniit nuussinernut nalinginnaasumik aalajangersakkanik naapertuutsitsilluni Kalaallit Nunaanni sulianik ilinniarfiusumut imaluunniit assingusutut ilinniagaqarfiusumut Naalakkersuisunit matussutissatut akiliutaasup akiliutigineratigut imaluunniit nuunneqarneratigut matussuserneqassapput.

Imm. 2. Kalaallit Nunaanni assingusunik sulianik ilinniarfinnik assigisaattulluunniit ilinniarfinnik peqanngippat, imaluunniit assingusumik ilinniarfimmi sungiusarnermik imaluunniit assingusumik sungiusarnermik neqeroortoqanngippat Ilinniartunut Sungiusartunullu Aningaasaateqarfiup aningaasaatai Kalaallit Nunaata avataani ilinniartunut sungiusartunullu sulianik ilinniarfimmi assigisaattulluunniit ilinniagaqarfiusumi ilinniarfimmi sungiusarnermut imaluunniit assingusumik tigussaasunik ilinniagaqarnermut piginnaasaanullu ineriartortitsinermut aningaasartuutit matussusernissaannut akilerneqarnissaannullu atorneqarsinnaapput. Taamaattorli ilinniartumut imaluunniit sungiusartumut ilinniarfimmi sungiusarnermut, imaluunniit assingusutut tigussaasumik ilinniagaqarnermut imaluunniit piginnaasaanik ineriartortitsinermut Kalaallit Nunaata avataani sulianik ilinniarfimmut imaluunniit assingusutut ilinniagaqarfiusumut akiliutaassatillugit aningaasartuutit taamatut ittut taamaallaat matussuserneqassapput. Akiliutit taama ittut nalinginnaasumik aalajangersakkanik naapertuutsitsilluni ilinniartumut imaluunniit sungiusartumut Naalakkersuisunit matussusiissutitut akiliutissap akiliutigineratigut matussuserneqassapput.

Imm. 3. Ilinniartunut Sungiusartunullu Aningaasaateqarfiup aningaasaatai atorneqarsinnaapput aamma akiliutigineqarsinnaapput matussutissatut sanaartornermi aningaasartuutitut inuussutissarsititut ilinniarfimmik sananermut allilerinermulluunniit, aamma ilinniarfinnut assigisaannut Kalaallit Nunaanni, aammalu pisortat ilinniartunut inissiaataannut assingusunillu inissianut, ilinniartunut aamma sungiusartunut Kalaallit Nunaanni, aningaasaateqarfiup aningaasaatai katersat ullorsiutit ukiuanni imm. 1-imi aamma imm. 2-mi aningaasartuutitut matussutissatut atorneqanngippata. Imm. 3 manna naapertorlugu sanaartugassanut aningaasartuutitut aningaasaateqarfiup aningaasaataanik atuineq akiliuteqarnerlu pisinnaavoq aningaasaliissutitut akuersissuteqarpat. Aningaasartuutit taama ittut taamatut akiliutitut imaluunniit nuussinernut nalinginnaasumik

aalajangersakkanik naapertuutsitsilluni attuumassuteqartunut pisortanut, ingerlatsisartuusumut imaluunniit suliffeqarfimmu Naalakkersuisunit matussusiinermik akiliutissap akiliutigineratigut imaluunniit nuunneratigut matussuserneqassapput.

Imm. 4. Aningaasaateqarfik taamaallaat akiliuteqarsinnaavoq tapiissutinik aningaasartuutitut imm. 1, 2 aamma 3 naapertorlugit, periarfissaqarpat aningaasaateqarfiup aningaasaatai katersat atornerisigut.

Imm. 5. Aningaasaateqarfiup aningaasaatai taamaallaat akiliutigineqartassapput imm. 1-3-mi aningaasartuutitut matussutissatut.

§ 24. Naalakkersuisut ersarinnerusunik §§ 19-23-mi pissutsinut aalajangersagaliorsinnaapput, aamma makkununga:

1) Atuarfinnut aamma ilinniarfinnut aningaasaateqarfiup aningaasaataanik akiliisarneq sungiusaammik sulisitsinermut assigisaannullu sungiusartitsinernut ilinniarnermut piginnaasanillu ineriartortitsinermut ilinniartunut aamma sungiusartunut atatillugu, takukkit § 23, imm. 1, 2, 4 aamma 5.

2) Aningaasaateqarfiup aningaasaataanik akiliuteqarneq, sanaartornermut aningaasartuutitut matussutissatut, imaluunniit inuussutissarsiutitut ilinniarfinnik allilerinernut assigisaannullu Kalaallit Nunaanni, aamma pisortat ilinniartunut inissiaataanni assigisaanillu inissianut ilinniartunut aamma sungiusartunut Kalaallit Nunaanni, takukkit § 23, imm. 3-5.

Kapitali 7

Ilinniartunik imaluunniit sungiusartunik sulisoqarnissamut piumasaqaatit pisortat suliariumannittussarsiuussinerini, neqeroorummik appasinnerpaamik atuinikkut

§ 25. Aalajangersakkat uani kapitali 7-imi atortinneqassapput pisortat imaluunniit pisortat suliffiutaat suliariumannittussarsiuussinerimi neqeroorutit appasinnerpaat atoraangatigit neqeroortitsinerit naapertorlugit isumaqatigiissuteqarnerni, nioqutissanik pisisarnerni imaluunniit kiffartuussinernik ingerlatsinerni, tamatumani aamma sanaartortitsinerni.

Imm. 2. Kapitalimili uani aalajangersakkat atortinneqassanngillat pisuni imm. 1-imi ilaasuni, neqeroorummi ilaappata nioqutissanik tunisaqarnissamik isumaqatigiissut imaluunniit kiffartuussineq, nalilerneqartoq 500.000 kr.-t ataallugilluunniit naleqartutut. Neqeroortitsinerimi ilaappata ataatsimut nioqutissanik tunisinissat imaluunniit kiffartuussinerit ataatsimut 500.000 kr.-t sinnerlugit naleqartut, neqeroortitsineq taanna isumaqatigiissutaasullu kapitali 7-imi aalajangersakkani ilaapput.

§ 26. Pisortat imaluunniit pisortat suliffiutaata suliariumannittussarsiuussinerimi pappialani isumaqatigiissutaasumilu inuiaqatigiinnut akisussaaffik aalajangersassavaa.

Imm. 2. Inuiaqatigiinnut akisussaaffik pillugu aalajangersagaq, tak. imm. 1, ilaatigut aalajangiissaaq ilinniartumik aamma sungiusartumik ataatsimik amerlanerusunilluunniit ilinniartoqarnissamik sungiusartoqarnissamilluunniit, ataatsimik arlalinnilluunniit

minnerpaamik ilinniartunik aamma sungiusartunik sulisoqarnissaanik neqerooruteqartumi, illuanilu neqeroortup ataatsimut akissarsianut aningaasartuutaanut, ukiumi arlalinniluunniit isumaqatigiissutip atuuffissaani isumaqatigiissutaasumik suliaqarnissami.

Ilinniartoqarnissamut aamma sungiusartunik sulisitsinissamut piumasaqaatit akissarsiarititat ataatsimoortut Naalakkersuisunit aalajangersarneqartut immikkoortuisa iluanni inissinneqassapput.

Imm. 3. Imm. 2 naapertorlugu akissarsiarititat immikkoortuisa ilaasa iluaniinnissaat pillugu aalajangersaasoqartinnagu Naalakkersuisut suliffeqarnermi illuatungeriinnik tusarniaassapput tamatuma aalajangersaaviginissaa pillugu.

§ 27. Neqeroortuni ajugaasoq isumaqatigiissummik tunniussisoqareernerani pisussaaffeqassaaq ilinniartoqarnissamut aamma sungiusartoqarnissamut piumasaqaatinik naammassinninnissamut, qaammatisiutit ukiuanni ukiuiniluunniit, isumaqatigiissummi tunniussassat tunniunneqassapput, tak. § 26, imm. 1 aamma 2.

Imm. 2. Neqeroortitsinermi ajugaasup ilinniartoqarnissamik aamma sungiusartoqarnissamik piumasaqaat, tak. imm. 1 aamma § 26, imm. 1 aamma 2, naammassisinnaavai sulisitassaminik suliffimmik allamik allanilluunniit atuinermigut piumasaqaammik naammassinninnermigut, firmat sulisitassat neqeroorummi nalunaarneqareersimappata.

§ 28. Isumaqatigiissut tunniunneqartoq aalajangersakkamik imaqassaaq pisortat imaluunniit pisortat suliffiutaata akiliutissami isumaqatigiissutaasumi ilanngaasinnaasut, neqeroortoq ajugaasoq ilinniartoqarnissamik aamma sungiusartunik atorfinitsitsinissamik piumasaqaammik naammassinnissimangippat, tak. § 27. 2018-imut ilanngaattissaq annertussuseqassaaq 30.000 kr.-nik ilinniartumut imaluunniit sungiusartumut ataatsimut neqeroortuusimasup ajugaasup sulisissallugu pisussaaffigisaanut ataatsimut kisianni ullorsiutit ukiuanni atorfinitsissimangisaanut. Ullorsiutit ukiuinut tulliuttunut tamanut ilanngaattissap angissusissaa Naalakkersuisunit aalajangerneqartassaaq.

Imm. 2. Imm. 1 naapertorlugu ilanngaattissap angissusissaa pillugu aalajangersaasoqartinnagu Naalakkersuisut suliffeqarnermi illuatungeriinnik tusarniaassapput tamatuma aalajangersaaviginissaa pillugu.

Imm. 3. Neqerooruteqartoq ajugaasoq ullorsiutit ukiuata ilaani ilinniartunik imaluunniit sungiusartunik ilinniartoqarnissamut piumasaqaataasunit ikinnerusunik ilinniartoqarsimappat sungiusartoqarsimappalluunniit, tak. § 27, taava pisortat imaluunniit pisortat suliffiutaat akiliutaasussani isumaqatigiissutaasuni ilanngaateqassaaq. Isumaqatigiissutaasut akiliutaasussami ilanngaattissanut naapertuuttumik annertussutsit naapertuutissapput, tak. imm. 1, ullorsiutit ukiuanni ilinniartoqarnissamik sungiusartoqarnissamillu piumasaqaataasumut naammassineqanngitsumut. Akiliutaasussami isumaqatigiissutaasumi ilanngaattissaq pissaaq ilanngaattissap ilaatut naapertuuttut, tak. imm. 1, naapertuuttumik ullorsiutit ukiuata ilaanut ilinniartunik aamma sungiusartunik sulisoqarnissamik piumasaqaatip naammassineqarfiginngisaanut. Ilanngaatit naapertuuttut

isumaqatigiissutaasut akiliutaasussamiit peerneqartut pissapput ilinniartukkaartumik imaluunniit sungiusartukkaartumik, neqeroortitsinermi ajugaasup sulisissallugit pisussaaffigisimasaaniit, kisiannili ullorsiutit ukiuata ilaani sulisissimanngisaaniit. Isumaqatigiissut tunniunneqartoq tamanna pillugu aalajangersakkanik imaqassaaq.

Imm. 4. Akiliutaasussamik isumaqatigiissutaasumik ilanngaasoqassanngilaq, tak. imm. 1, neqerooruteqartup uppersarsinnaappagu pisariaqartunik naammattunillu iliuseqarsimalluni najugaqavissunik ilinniartunik aamma sungiusartunik § 10 aamma naapertorlugu atorfinitsitsiniarluni, taamaakkaluatorli ilinniartoqarnissamik aamma sungiusartoqarnissamik piumasaqaat naammassisinnaasimanagu, tak. § 27.

§ 29. Neqerooruteqartoq tassaappat suliffeqarfiit ataatsimoortut, taava aalajangersakkat §§ 25-mit 28-mut suliffeqarfinnut pineqartunut tamanut ataatsimut atortinneqassapput.

§ 30. Naalackersuisut ersarinnerusunik aalajangersagaliorsinnaapput pissutsinut §§ 25-mit 29-mut pineqartunut, tamatumaniilu aamma imaattuni:

- 1) Pisortat imaluunniit pisortat suliffiutaata aalajangersaanera aamma atuinera inuiaqatigiinni akisussaaffik pillugu aalajangersakkamik neqeroortitsinermit pappialaniittumik aamma isumaqatigiissutaasoq, tak. §§ 26 aamma 27.
- 2) Neqeroortuni ajugaasup naammassinninnera imaluunniit naammassinninnginnera ilinniartoqarnissamik aamma sungiusartoqarnissamik, tak. § 27.
- 3) Pisortat imaluunniit pisortat suliffiutaata akiliutaasussatut isumaqatigiissutaasunit ilanngaanaera neqeroortuni ajugaasup ilinniartoqarnissamik aamma sungiusartoqarnissamik piumasaqaammik, tak. § 28.

Kapitali 8

Ilinniartunik imaluunniit sungiusartunik sulisitsinissamik piumasaqaatit pisortat neqeroortitsisarnerini neqeroorummik aningaasatigut iluatinnarnerpaamik atuinikkut imaluunniit assingusunik suliassiinermi periaaseqarnerni

§ 31. Kapitalimi 8-mi uani aalajangersakkat atortinneqassapput pisortat imaluunniit pisortat suliffiutaasa atoraangassuk neqeroortitsinermi tunngavissaq aningaasatigut neqeroort soqutiginarnerpaaq, imaluunniit neqeroortitsinermi atugassarititaasoq alla oqimaalutaanermi minnerpaamik akiusup saniatigut piumasaqaammik ataatsimik isiginiaaviusoq. Kapitalimi 8-mi uani aalajangersagaq atortinneqassaaq neqeroortitsinerit atornerqarpata taamaattut aammalu tamatumunnga atatillugu isumaqatigiissuteqarnerni nioqqutissanik tunisaqartarnissanut imaluunniit kiffartuussinernut.

Imm. 2. Kisiannili kapital 8-mi aalajangersakkat atuutissanngillat imm. 1 ilaatinneqarpata, neqerooruteqartitsineq nioqqutissamik sullissummilluunniit 500.000 kr.-nik ataallugilluunniit naleqartutut missingiunneqartumik tunniussisoqarsinnaaneq isumaqatigiissutigineqarpata. Neqerooruteqartitsineq isumaqatigiissutit arlallit nassiunneqartussanut ataatsimut

imminnulluunniit atasunik katillugit 500.000 kr.-t sinnerlugit naleqartutut missingerneqartunut tunngagaangata, neqeroorutit isumaqatigiissutillu ataasiakkaat uani kapital 8-mi aalajangersakkanut ilaapput.

§ 32. Pisortat imaluunniit pisortat suliffiutaat isumaqatigiissuteqaruni, pisortat imaluunniit suliffeqarfiup taamaattumik tunngaviusutut atussavaa neqeroortup neqeroorutaa ilinniartunik imaluunniit sungiusartunik aalajangersimasunik amerlassusilinnik atuinissaa, suliassanik ingerlatsinermi pilersitsinermut aamma isumaqatigiissutaasut naapertorlugit suliassanik suliaqarnermi.

Imm. 2. Pisortat imaluunniit pisortat suliffiutaata neqeroortitsinermi pappialani nalunaassavai tunngaviusussat imm. 1-imi eqqaaneqartut qanoq oqimaalutarnissaat, tunngaviusussanut allanut sanilliullugit. Tunngaviusut imatut naleqartinneqassapput:

- 1) 2018-imut tunngaviusut oqimaalutarneqassapput 4 %-ip aamma 15 %-ip akornani neqeroortitsinerne sanaartugassanik imaluunniit isumaqatigiissutini allani, suliassat isumaqatigiissummiittut annertunersaat Kalaallit Nunaanni ingerlanneqarfigisaanni.
- 2) 2018-imut tunngaviusussat oqimaalutarneqassapput 2 %-ip aamma 8 %-ip akornani neqeroorutitut isumaqatigiissutini nr. 1-imi ilaangitsuni.
- 3) Ullorsiutit ukiuinut tulliuuttunut tamanut tunngavissanik oqimaalutaaneq aningaasanut inatsimmi oqaaseqaatini aalajangerneqartassaaq. Tunngavissat aalajangerneqarsinnaapput assignngitsunik oqimaassusilerlugit neqeroorutitut isumaqatigiissutini nr. 1-imi eqqaaneqartunut, aamma neqeroorutitut isumaqatigiissutini nr. 2-mi eqqaaneqartunut.

Imm. 3. Pisortat imaluunniit pisortat suliffiutaat neqeroortitsinermut pappialaati aalajangersaasassapput ilinniartumik aamma sungiusartumik ataatsimik arlalinnilluunniit minnerpaaffissatut ilinniartut imaluunniit sungiusartut sulisitassat minnerpaaffissaattut, pisortat imaluunniit suliffeqarfiup atussallugit kissaatigisai, suliamik ingerlatsinermi sanaartornermi aamma isumaqatigiissutaasoq naapertorlugu kiffartuussinermik tunniussami.

§ 33. Tunngaviusoq § 32, imm. 1-imi eqqaaneqartoq imatut atortinneqassaaq:

- 1) Neqeroortup neqeroorutigippagu ilinniartut imaluunniit sungiusartut amerlanerpaat atorummallugit: Neqeroortoq tunngaviusoq naapertorlugu point-inik qaffasinnerpaanik anguneqarsinnaasunik tunineqassaaq.
- 2) Neqeroortup neqeroorutigippagu ilinniartut imaluunniit sungiusartut amerlassutsimikkut naapertuuttut imaluunniit ikinnerusut ilinniartoqarnissamut aamma sungiusartoqarnissamut neqeroortitsinermi pappialani piumasqaataasuniit atorummallugit, tak. § 32, imm. 3: Neqeroortoq pointinik 0-nik tunineqassaaq.
- 3) Neqeroortup neqeroorutigippagu ilinniartut imaluunniit sungiusartut amerlassutsimikkut nr. 1-imi eqqaaneqartumit neqeroortumit ikinnerusut, aamma ilinniartoqarnissamut aamma sungiusartoqarnissamut neqeroortitsinermi pappialani nalunaarneqartunit amerlanerusut, tak. § 32, imm. 3: Neqeroortoq uani nr. 3-mi pineqartunut ilaasoq point-inik ima amerlassusilinnik tunineqassaaq neqeroortup pisimasassaraluinik, neqeroortoq neqerooruteqarsimasuuguni

ilinniartunik imaluunniit sungiusartunik nr. 1-imi neqerooruteqartup neqeroorutigisaanik. Pointit normumi uani tunniunneqassapput sanimut narlusuumik naatsorsuinikkut.

§ 34. Neqerooruteqartoq ajugaasoq isumaqatigiissut tunniunneqartoq tunngavigalugu pisussaataaassaaq atussallugit minnerpaamik ilinniartut imaluunniit sungiusartut neqeroornermi pineqartut, suliassamik suliaqarnermini pilersitsinermi aamma isumaqatigiissutaasumi kiffartuussinermi suliamik ingerlatsinermini.

Imm. 2. Neqerooruteqartoq ajugaasoq imm. 1 naapertorlugu piumasqaammik naammassinnissinnaavoq suliffeqarfimmik 1-imik amerlanerusunilluunniit sulisitaqarnermigut piumasqaammik naammassinnittunik, suliffeqarfiit sulisitaasut neqeroortitsinermi pappialaatini nalunaarneqarsimappata.

§ 35. Isumaqatigiissutaasoq imaqassaaq aalajangersakkanik pisortat imaluunniit pisortat suliffiutaat akiliutaasussatut isumaqatigiissutaasumit ilanngaateqassasoq, ilanngaatit akiliutissamik, neqeroortuni ajugaasup naammassinnigippagu ilinniartunik imaluunniit sungiusartunik sulisorissassatut neqeroorutaasimasut amerlassusissaat, suliassamik suliamik ingerlatsinermi sanaartornermi aamma isumaqatigiissutaasoq naapertorlugu kiffartuussinermik tunniussami, tak. § 34. 2018-imut aningaasat ilanngaataasussat 30.000 kr.-usassapput ilinniartumut imaluunniit sungiusartumut ataatsimut, neqeroortup ajugaasup sulisorissallugit pisussaaffigisaanut, kisiannili sulisorinnigisaanut suliassani pineqartuni ullorsiutit ukiuanni. Ullorsiutit ukiuini tulliuuttuni tamani ilanngaataasussat Naalakkersuisunit aalajangerneqartassapput.

Imm. 2. Imm. 1 naapertorlugu ilanngaatissap angissusissaa pillugu aalajangersaasoqartinnagu Naalakkersuisut suliffeqarnermi illuatungeriinnik tusarniaassapput tamatuma aalajangersaaviginissaa pillugu oqallisigineqassapput.

Imm. 3. Suliassanut isumaqatigiissutaasunut akiliutaasussatut isumaqatigiissutaasumi ilanngaasiisoqassanngilaq, neqerooruteqartup uppersarsarsinnaappagu iliuusissat pisariaqartut tamaasa iliuuserisimallugit, ilinniartunik imaluunniit sungiusartunik sulisitsiniarluni, tak. aamma § 10, kisiannili periarfissaqarsimanani isumaqatigiissutaasumi pisussaaffiusut naammassinissaannut.

§ 36. Neqerooruteqartoq tassaappat suliffeqarfiit ataatsimoortut, taava aalajangersakkat §§ 31-35 suliffeqarfinnut pineqartunut tamanut ataatsimut atortinneqassapput.

§ 37. Naalakkersuisut ersarinnerisunik aalajangersagaliorsinnaapput pissutsinut §§ 31-36-mi eqqaaneqartunut, tamatumani aamma makkununnga:

1) Pisortat imaluunniit pisortat suliffiutaata atuinissamut tunngavissanik aalajangersaanissaa neqerooruteqartup neqeroorutaani ilinniartunik imaluunniit sungiusartunik aalajangersimasunik amerlassusilinnik sulisitsinissamut suliassamik ingerlatsinermi pilersitsinermut atatillugu aamma isumaqatigiissutaasut naapertorlugit suliat

tunniunneqarneranni, tak. § 32, imm. 1.

2) Pisortat imaluunniit pisortat suliffiutaata tunngavissatut aalajangersakkanik nr. 1-imi pineqartunik oqimaalutaanera atuineralu isumaqatigiissuteqarnermi, tunngavissanillu oqimaalutakkanik aalajangersaanera, takukkit §§ 32, imm. 2, aamma 33.

3) Pisortat imaluunniit pisortat suliffiutaata aalajangersaanera ilinniartunik sungiusartumilluunniit ataatsimik imaluunniit arlalinnik sulisitsinissamut piumasqaateqarnera, tak. § 32, imm. 3.

4) Neqeroortuni ajugaasup naammassinninnera imaluunniit naammassinninnginnera ilinniartunik imaluunniit sungiusartunik neqeroortugineqartutut minnerpaamik amerlassusilinnik sulisitsinissamut pisussaaffimmik, suliaqarnermi pilersitassanik aamma kiffartuussinerni, tak. § 34.

5) Pisortat imaluunniit pisortat suliffiutaata akiliutissatut isumaqatigiissutaasumit ilanngaateqarnera suliariumannittussarsiuussinermi ajugaasup ilinniartoqarnissamik aamma sungiusartoqarnissamik piumasqaammik naammassinninnginnerani, tak. § 35.

Kapitali 9

Siunnersuisarnermut isumaqatigiissutit

§ 38. Naalackersuisut aalajangersaasinnaapput aammalu aalajangiisinnaallutik pisortat aamma pisortat suliffiutaasa neqeroortitsisarnerinut aamma isumaqatigiissuteqartarnerinut siunnersuisarnermut tunngatillugu, tamatumani aamma inatsisinut tunngasuni, aningaasaqarnikkut aamma teknikkikkut pissutsinut tunngasuni, §§ 25-mit 37-mut aalajangersakkani ilaasussaannginnerat pillugu.

Kapitali 10

Ilinniartunik aamma sungiusartunik atorfinitsitsisarneq aamma atuisarneq pillugu nalunaarusiortarneq il.il.

§ 39. Pisortat imaluunniit suliffeqarfik ukiumut ataasiarluni Naalackersuisunut nalunaarummik nassiussaqartassaaq, pisortat suliffeqarfiulluunniit Inatsisartut inatsisaannut attuumassutai ullorsiutit ukiuata siuliani pillugit. Nalunaarut januarip naannginnerani nassiunneqartassaaq.

Imm. 2. Pisortanit imaluunniit pisortat suliffiutaannit nalunaarusiaat paasissutissanik imaattunik imaqartassapput:

1) Sulisut amerlassusaat pisortat imaluunniit suliffeqarfiup ullorsiutit ukiuata siuliani sulisorisimasai qaammatini tamani.

2) Agguaqatigiissillugit sulisuusut amerlassusaat pisortat imaluunniit suliffeqarfiup ullorsiutit ukiuata siuliani sulisorisimasaat.

3) Ilinniartut aamma sungiusartut pisortat imaluunniit suliffeqarfiup ullorsiutit ukiuata

siuliani qaammatini tamani sulisorisimasai.

4) Ilinniartut aamma sungiusartut pisortat imaluunniit suliffeqarfiup sulisorisimasai qaammatini tamani ullorsiutit ukiuata siuliani.

5) Pisortat imaluunniit suliffeqarfiup ullorsiutit ukiuata siuliani ikinnerusunik sulisoqarsimappat, pisortat imaluunniit suliffeqarfiup inatsisartut inatsisaat naapertorlugu pisussaaffigisaanut sanilliullugu, taava pisortat imaluunniit suliffeqarfiup ilisimatitsissutigissavai tamatumunnga tunuliaqutaasut, aamma suliniutit pisortat imaluunniit suliffeqarfiup pisussaaffik naammassiumallugu iliuuserisimasai.

Imm. 3. Pisortat imaluunniit pisortat suliffiutaat ullorsiutit ukiuata siuliani neqeroortitsinermik ingerlatsisimappat aalajangersakkani kapitali 7-imiittuni ilaasumik, imaluunniit kiffartuussinermik tunniussivigineqarpat neqeroortitsinikkut pineqartutut isumaqatigiissutaasumut ilaasunik, pisortamit imaluunniit suliffeqarfimmit nalunaarusiaq paasissutissanik makkuninnga imaqassaaq:

1) Neqeroortitsineq.

2) Isumaqatigiissummik tunngaveqartumik kiffartuussinerup nalingatut nalilerneqartoq. Neqeroortitsinermi isumaqatigiissutit arlaqartut ilaappata ataatsimoortumik imaluunniit ataqatigiissumik nioqqutissanik tunniussisarnissanik kiffartuussinernilluunniit imaqartunik: Kiffartuussinissanik isumaqatigiissutaasut nalingat missiliuussaq.

3) Inuiaqatigiinnut akisussaaffimmut aalajangersakkat aamma ilinniartuq aamma sungiusartuq 1-i arlaqartulluunniit, neqeroortitsinermi pappialaatini aalajangersakkat aamma isumaqatigiissutigineqartoq, tak. § 26.

4) Neqeroortuni ajugaasup naammassinninnissaa imaluunniit naammassinninnginnissaa nr. 3-mi pineqartunik aalajangersakkanik, tamatumani aamma akiliutaasussatut isumaqatigiissutaasumi ilanngaasiisoqarsinnaanera pisussaaffinnik naammassinninnginnermi, tak. § 28.

Imm. 4. Pisortat imaluunniit pisortat suliffiutaat ullorsiutit ukiuata siuliani neqeroortitsisimappata kapitalimi 8-mi aalajangersakkanik tunngavilimmik, imaluunniit kiffartuussivigineqarsimappata neqeroortitsinermik tunngaveqartumik isumaqatigiissut naapertorlugu, pisortanit imaluunniit suliffeqarfimmiit nalunaarusiaq imaqassaaq paasissutissanik imaattunik:

1) Neqeroortitsineq.

2) Isumaqatigiissummik tunngaveqartumik kiffartuussinerup nalingatut nalilerneqartoq. Neqeroortitsinermi isumaqatigiissutit arlaqartut ilaappata ataatsimoortumik imaluunniit ataqatigiissumik nioqqutissanik tunniussisarnissanik kiffartuussinernilluunniit imaqartunik: Kiffartuussinissanik isumaqatigiissutaasut nalingat missiliuussaq.

3) Neqeroortitsinermut pappialani kriteeriat aalajangersakkat neqeroortup ilinniartunik imaluunniit sungiusartunik aalajangersimasunik amerlassusilinnik atuinissaanik sulianik ingerlatsinermi aamma isumaqatigiissutaasut naapertorlugit kiffartuussinermi, tak. § 32, imm. 1 aamma 2.

4) Aalajangersakkat neqeroortitsinermi pappialaatini ilinniartumik aamma sungiusartumik

ataatsimik arlalinnilluunniit sulisitsinissamik piumasaqartut, pisortat imaluunniit suliffeqarfiup sulisorineqartussatut suliat ingerlanneqarneranni aamma kiffartuussinernik ingerlatsinerni kissaatigisai, tak § 32, imm. 3.

5) Pisortat imaluunniit pisortat suliffiutaata atugassarititaasunik nr. 3 aamma 1-imi eqqaaneqartunik atuinissaa, imaluunniit ilinniartunik aamma sungiusartunik amerlanerusunik atuinissamut piumasaqaatit neqeroorummi nr. 4-mi eqqaaneqartut.

6) Isumaqatigiissutigineqartumi neqeroortuni ajugaasup pisussaaffii pillugit aalajangersakkat minnerpaatut ilinniartunik imaluunniit sungiusartunik sulisitsinissamut, pilersitsinermi aamma isumaqatigiissutaasumi suliassanik tunniussinermi aamma akiliutaasussatut isumaqatigiissutaasumit ilanngaassinissaq, pisussaaffiusut naamassineqanngippata, tak. §§ 34-36.

7) Neqeroortuni ajugaasup naamassinninnissaa imaluunniit naamassinninnginnissaa pisussaaffimminik nr. 6-imi eqqaaneqartunik, tamatumani aamma akiliutaasussatut isumaqatigiissutaasup ilanngarneqarsinnaanera, pissussaaffinnut naamassinnigisanut tunngatillugu.

Imm. 5. Suliffeqarfimmiit namminersortumiit nalunaarusiaq paasissutissanik imaattunik imaqassaaq:

1) Ullorsiutit ukiuata siuliani akissarsiat akilerneqartut ataatsimut nalingat.

2) Ilinniartut aamma sungiusartut suliffeqarfiup ullorsiutit ukiuata siuliani sulisorisimasaasa amerlassusiat.

3) Ilinniartut aamma sungiusartut suliffeqarfiup ullorsiutit ukiuata siuliani qaammatikkaartumik sulisorisimasaasa agguaqatigiissillugu amerlassusiat.

4) Suliffeqarfik neqeroortitsinermi kapitalimi 7-imi aalajangersakkanut ilaasuni ajugaasusimasooq, ilinniartunik imaluunniit sungiusartunik ullorsiutit ukiuata siuliani ikinnerusunik sulisitsisimappat, suliffeqarfiup ilinniartoqarnissamut aamma sungiusartoqarnissamut piumasaqaataasunit ikinnerusut sulisorisimappagit, tak. §§ 27-29: Suliffeqarfiup ilisimatitsissutigissavaa neqeroorneq aamma pisussaaffigisani, aamma tunuliaqutaasut pisussaaffimminik naamassinninnginnermut aammalu iliuutsit suliffeqarfiup suut iliuuserisimanerlugit pisussaaffini naamassiniarlugu.

5) Suliffeqarfik neqeroortutut ajugaasutut kapitali 8-mi aalajangersakkanut ilaasumi suliami, ilinniartunik imaluunniit sungiusartunik ikinnerusunik suliassanik suliaqarnermini isumaqatigiissummilu suliassanik tunniussinermi, suliffeqarfiup isumaqatigiissut naapertorlugu pisussaaffigisaanik, tak. §§ 34-36: Suliffeqarfiup ilisimatitsissutigissavai pisussaaffimmik naamassinninnginnini, aamma suliniutit pisussaaffimmik naamassinninniarluni suliarisimasani.

Imm. 6. Naalackersuisut ersarinnerusunik aalajangersagaliorsinnaapput nalunaarummik imm. 1-5 naapertorlugu nassiussisarnissamut tunngatillugu, aamma paasissutissanik nalunaarsuisarneq paasissutissanillu nassiussisarneq pissutsinut imm. 1-5-imi pineqartunut tunngatillugu. Naalackersuisut tamatumani aamma aalajangersaasinnaapput nalunaarusiortarnermi skemamik atuinissamut, Naalackersuisunit suliaasumik, aamma

elektroniskiusumik nalunaarsuisarnissanik skemani internet-imi quppernemi Naalakkersuisunit ingerlanneqartumi.

Kapitali 11

Pisortat suliaqarnerat, aamma pisortat suliaqarneranni aningaasartuutininik akiliuteqarnerit

Pisortat suliaqarnerat

§ 40. Inatsisartut inatsisaanni pissutsit ilaasut tamaasa pillugit, ilanngullugit Inatsisartut inatsisaata nassatarisaanik aalajangersakkanik, Naalakkersuisut nakkutilliillutillu aalajangiisarput.

Imm. 2. Inatsisartut inatsisaata eqqortinneqarnissaa pillugu, aamma Inatsisartut inatsisaata nassatarisaanik aalajangersakkanik eqqortitsisarneq pillugu, Naalakkersuisut peqqusissummik nalunaaruteqarsinnaapput. Peqqussutit nalunaarutigineqarsinnaapput pisortanut aamma suliffeqarfinnut Inatsisartut inatsisaanni pineqartunut.

Imm. 3. Naalakkersuisut pisortatut suliamik ingerlatsinerup ilaatut Inatsisartut inatsisaat naapertorlugu paasissutissat pisariaqartut inunnut tunngasut suliarisinnaavaat peqqusinnaallugillu pisortat kikkulluunniit suliffeqarfiillu Inatsisartut inatsisaanni pineqartut.

§ 41. Inatsisartut inatsisaata atortinneqarfii tamaasa pillugit Naalakkersuisut erseqqinnerusunik aalajangersaasinnaapput, ilanngullugit pisortat aamma suliffeqarfiit Inatsisartut inatsisaat naapertorlugu ilinniartunik sungiusartunillu atorfeqartitsinissaq siunertaralugu naapertuuttumik suliaqarnissaat pillugu, aamma pissutsit allat pisortat aamma suliffeqarfiit ilinniartunik sungiusartunillu atorfinitsitsisarnerisa siuarsarnissaat pillugit.

Pisortat suliaqarneranni aningaasartuutininik akiliuteqarnerit

§ 42. Naalakkersuisut aalajangersaasinnaapput aammalu aalajangiisinnaallutik pisortat aamma suliffeqarfiit suliamik ingerlatsinernut aningaasartuutininik akiliisarnissaat pillugu, pisortat allatigut suliaqarnerit ingerlatsisarneri pillugit aamma pisortat allanik Inatsisartut inatsisaat naapertorlugu pisortatut suliaqartarnissaat pillugu. Akiliut akitsuutitut imaluunniit aningaasartuutaasunik matussusiinertut akiligassiissutigineqarsinnaavoq.

Kapitali 12

Aalajangernernik Naalakkersuisunut eqqartuussivinnullu saqqummiussisarnerit

§ 43. Pissutsit Inatsisartut inatsisaata atortinneqarfiinut ilaasut pillugit aalajangernerit Naalakkersuisunut saqqummiunneqarsinnaapput suliap nalilersoqqinnissaa qinnutigalugu.

Imm. 2. Imm. 1 naapertorlugu aalajangigaq ukunanit nalilersoqqinnissaa qinnutigalugu saqqummiunneqarsinnaavoq:

- 1) Suliami peqataasumit.
- 2) Sulianut tunngasumik peqatigiiffiit kattuffiillu sulinermik inuussutissarsiutilinnut aamma sulisisusunut sammisut Kalaallit Nunaanni angerlarsimaffillit, malittarisassatik naapertorlugit najugaqavissut suliffeqarnerannut aamma ilinniartitaanerannut pingaarnertut soqutigisaqartut.

Imm. 3. Imm. 1 malillugu aalajangiussinermik nalilersueqqinnissaq pillugu qinnuteqaatip saqqummiunnera allaganngorlugu pissaaq.

Imm. 4. Aalajangikkamik nalilersueqqinnissaq pillugu qinnuteqaammik saqqummiussinermut piffissaliussaq tassaavoq ullormit aalajangiussap peqataasumut nalunaarutigineranit sapaatit akunneri 6-it. Taamaattorli aalajangiussineq tamanut nalunaarutigineqarsimappat nalunaarutiginninnermit piffissaliussaq tamatigut naatsorsorneqartarpoq. Piffissaliussaq arfininngornermut imaluunniit nalliuttumut killeqarpat piffissaliussaq ulluinnarmut tullinnguuttumut sivitsorneqassaaq. Imm. 1 malillugu nalilersueqqinnissaq pillugu qinnuteqaat, pissutsit immikkut ittut tunngavissaqartitsippata piffissaliussap naanerata kingornatigut saqqummiunneqarsinnaanersoq Naalakkersuisut aalajangersinnaavaat.

Imm. 5. Aalajangiussamik nalilersueqqinnissaq pillugu qinnuteqaat kinguartitsisutut sunniuteqanngilaq, kinguartitsisutut sunniuteqartoqassanerani Naalakkersuisut aalajangiissanngippata.

Imm. 6. Aalajangiussamik nalilersueqqinnermi aalajangiussamik Naalakkersuisut attassisinnaapput, tamakkiisumik imaluunniit ilaannakortumik allannguuteqartitsisinnaapput imaluunniit atorunnaarsitsisinnaapput.

Imm. 7. Imm. 1-6-imi nalilersueqqinneq aamma pissutsit pillugit Naalakkersuisut erseqqinnerusunik aalajangersaasinnaapput.

§ 44. Pissutsit Inatsisartut inatsisaata atortinneqarfiinut ilaasut pillugit aalajangerneq taamaallaat Kalaallit Nunaanni piginnaatitaasunut eqqartuussivinnut saqqummiunneqarsinnaavoq. Aalajangiussaq eqqartuussivinnut saqqummiunneqartoq Kalaallit Nunaanni Eqqartuussivinnut siullertut pisussaaffilittut saqqummiunneqassaaq.

Imm. 2. Peqataasumut aalajangiussinerup nalunaarutigineranit ullormit kingusinnerpaamik qaammatit 12-it qaangiunnerisigut eqqartuussivinnut saqqummiussineq pissaaq. Taamaattorli aalajangiussineq tamanut nalunaarutigineqarsimappat piffissaliussaq nalunaarutiginninnermit tamatigut naatsorsorneqartassaaq. Piffissaliussaq arfininngornermut imaluunniit nalliuttumut killeqarpat piffissaliussaq ulluinnarmut tullinnguuttumut sivitsorneqassaaq.

Imm. 3. Aalajangiussamik eqqartuussivinnut saqqummiussineq kinguartitsisutut sunniuteqanngilaq, kinguartitsisutut sunniuteqartoqassanerani Naalakkersuisut aalajangiissanngippata.

Kapitali 13

Pineqaatissiissutit

§ 45. Piaaraluni imaluunniit mianersuaalliorujussuarluni unioqqutitsisoq akiligassillugu eqqartuunneqarsinnaavoq:

- 1) Akiligassiisummik pisussaaffiusumik ilinniartunut aamma sungiusartunut akitsuummik Ilinniartunut aamma Sungiusartunut Aningaasaateqarfimmut akiliinngitsoq peqqussutaasumut akerliusumik, Naalakkersuisunit nalunaarutigineqartumik § 18, imm. 1 naapertorlugu.
- 2) Nalunaarummik imaluunniit pappialanik nassiussassanik paasissutissanilluunniit Naalakkersuisunit nassiussinngitsoq, § 39 -imut akerliusumik, imaluunniit Naalakkersuisunit aalajangersagalianut § 39, imm. 6 naapertorlugu.
- 3) § 40, imm. 2 malillugu Naalakkersuisunit nalunaarutigisaasumit Inatsisartut inatsisaannik, imaluunniit tamatuma nassatarisaatut aalajangiussamik aalajangersakkamik naapertuutsitseqqusineq pillugu peqqusisummik malittarinninnginneq.
- 4) Peqqusummik paasissutissanik nassitsinissamik imaluunniit pappialaanik nassitsinissamik Naalakkersuisunit peqqussutigineqartunik § 40 imm. 3 naapertorlu malittarinninnginnermi.

Imm. 2. Inatsisartut inatsisaat malillugu aalajangersakkat tunngavigalugit aalajangersarneqarsinnaavoq Kalaallit Nunaanni pinerluttulerinermut inatsit malillugu aalajangersakkanik unioqqutitsineq akileeqqusisummik eqqartuussivigineqarsinnaasoq.

Imm. 3. Imm. 1 malillugu imaluunniit imm. 2-mi Inatsisartut inatsisaata nassatarisaanik aalajangersakkat naapertorlugit akileeqqusissut Kalaallit Nunaanni pinerluttulerinermut inatsimmi malittarisassiat malillugit inatsisitigut inuttut naatsorsuussamut peqqussutigineqarsinnaapput.

Imm. 4. Inatsisartut inatsisaata nassatarisaanik, imaluunniit Inatsisartut inatsisaata nassatarisaanik aalajangersagaliornert naapertorlugit akileeqqusissutitut eqqartuussissutit nunatta karsianut tussapput.

Kapitali 14

Atuutsilerner

§ 46. Inatsisartut inatsisaat 1. januar 2018-imi atuutilerpoq.

Imm. 2. Sanaartornermi ilinniartoqartarnek pillugu Namminersorlutik Oqartussat nalunaarutaat nr. 10, 12. juli. 2010-meersoq atorunnaarsinneqarpoq.

Namminersorlutik Oqartussat, ulloq xx. xxxx 2017

Kim Kielsen